

UDHËZIM
Nr. 3, datë 15.2.2023

**PËR PËRCAKTIMIN E DIPLOMAVE UNIVERSITARE TË NJËVLERSHME,
TË NGJASHME OSE TË PËRAFËRTA ME FUSHËN/LËNDËT E
MËSIMDHËNIES NË ARSIMIN PARAUNIVERSITAR DHE KRITERET PËR
HAPJEN E PROGRAMEVE TË STUDIMEVE TË FORMIMIT TË
VAZHDUAR NË FUSHËN PSIKO-PEDAGOGJIKE**

Në mbështetje të nenit 102 të Kushtetutës së Republikës së Shqipërisë dhe të pikës 4, të nenit 57, të ligjit nr. 69/2012, “Për sistemin arsimor parauniversitar në Republikën e Shqipërisë”, të ndryshuar,

UDHËZOJ:

KREU I

**KRITERET PËR PËRCAKTIMIN E DIPLOMËS UNIVERSITARE TË
NJËVLERSHME, TË NGJASHME OSE TË PËRAFËRT ME FUSHËN/LËNDËT E
MËSIMDHËNIES NË ARSIMIN PARAUNIVERSITAR**

1. Profesioni i mësuesit në institucionet arsimore të sistemit arsimor parauniversitar, mund të ushtrohet edhe nga individë që plotësojnë kriteret e mëposhtme:

a) zotërojnë diploma të programeve të studimit të lëshuara në Republikën e Shqipërisë, që kanë zgjatur së paku 4 (katër) vite akademike (8 semestra), deri në përshtatjen e studimeve sipas parimeve të procesit të Bolonjës, diplomë universitare të ciklit të parë dhe ciklit të dytë ose diplomë universitare të integruar, të ngjashme ose të përafërt me fushën/lëndët e mësimdhënies në arsimin parauniversitar;

b) zotërojnë certifikatë për formimin psiko-pedagogjik, të lëshuar nga institucione të arsimit të lartë (IAL), që ofrojnë programe të studimeve të formimit të vazhduar në fushën e mësuesisë.

2. Diplomë e njëvlershme, e ngjashme ose e përafërt për ushtrimin e profesionit të mësuesit do të konsiderohet, plotësimi i kriterëve si vijon:

a) Diploma e programit të studimit të ciklit të parë “Bachelor” të jetë në fushën/lëndët e arsimit të mesëm të ulët dhe të arsimit të mesëm të lartë, sipas aneksit nr. 1, bashkëlidhur dhe pjesë përbërëse e këtij udhëzimi.

b) Diploma e ciklit të dytë “Master i shkencave”/ “Master i arteve” ose “Master profesional” me 120 kredite apo ekuivalente me to, të lëshuara nga institucione të arsimit të lartë, programi i studimit të së cilës të përputhet me një nga fushat/lëndët e mësimdhënies në arsimin parauniversitar, të përcaktuara në aneksin nr. 1, bashkëlidhur dhe pjesë përbërëse e këtij udhëzimi.

KREU II

**KRITERET DHE PROCEDURAT PËR HAPJEN E PROGRAMIT TË STUDIMIT
TË FORMIMIT TË VAZHDUAR NË FUSHËN PSIKO-PEDAGOGJIKE**

1. Programet e studimit të formimit të vazhduar në fushën psiko-pedagogjike, ofrohen nga institucionet e arsimit të lartë që kanë programe studimi të ciklit të parë dhe të dytë në fushën e mësuesisë, në përputhje me përcaktimet e ligjit nr. 80/2015 “Për arsimin e lartë dhe kërkimin shkencor në institucionet e arsimit të lartë në Republikën e Shqipërisë”.

2. Programet e studimit të formimit të vazhduar në fushën psiko-pedagogjike organizohen me jo më pak se 30 kredite dhe me kohëzgjatje normale një semestër.

3. Kërkesa për hapjen e programit të studimit të formimit të vazhduar në fushën psiko-pedagogjike duhet të përmbajë dokumentacionin si më poshtë:

a) propozimin e njësive bazë ku do të ofrohet programi i studimit;

- b) vendimin e senatit akademik dhe bordit të administrimit për miratimin e hapjes së programit;
- c) planin mësimor dhe planin lëndor (*syllabus*) e moduleve/lëndëve;
- d) rregulloren e programit të studimit;
- e) listën e plotë emërore të personelit akademik me kohë të plotë dhe të pjesshme për programin e studimit, ngarkesën mësimore dhe formën e punësimit, si dhe titullin akademik dhe gradën shkencore përkatëse;
- f) dosjen e personelit e cila përmban:
- kontratën e punës me personelin e planifikuar për t'u angazhuar me kohë të plotë, në rast të hapjes së programit ose vërtetimit nga rektori mbi kategorinë e personelit akademik dhe kohëzgjatjen e kontratës me ose pa afat të caktuar;
 - dëshmitë që vërtetojnë shkollimin e kualifikimet, titujt dhe gradat (fotokopje);
 - letrën e angazhimit të çdo anëtarit të personelit akademik të planifikuar për t'u angazhuar me kohë të pjesshme;
 - lejen e punëdhënësit kryesor për anëtarët e personelit akademik me kohë të pjesshme.
4. Procedura për shqyrtimin e dokumentacionit për hapjen e programit të studimit të formimit të vazhduar në fushën psiko-pedagogjike është si më poshtë:
- a) shqyrtimi paraprak i dokumentacionit të mësipërm kryhet nga një komision i ngritur me urdhër të ministrit, me përfaqësues nga ministria përgjegjëse për arsimin, Agjencia për Sigurimin e Cilësisë në Arsimin Parauniversitar, Qendra e Shërbimeve Arsimore dhe Drejtoria e Përgjithshme e Arsimit Parauniversitar, brenda 21 ditëve nga depozitimi i kërkesës së IAL-së dhe dokumentacionit shoqërues. Në rastet kur dokumentacioni është i paplotë apo konstatohen mangësi/pasaktësi, ministria i kërkon IAL-së të bëjë plotësimin/saktësimin e dokumentacionit brenda 15 ditëve nga data e njoftimit. Në mungesë të plotësimit të dokumentacionit brenda këtij afati, konsiderohet se subjekti ka hequr dorë në heshtje nga aplikimi dhe praktika arkivohet;
- b) në rast se dokumentacioni konsiderohet i plotë, me urdhër të ministrit përgjegjës për arsimin, miratohet hapja e programit të studimit të formimit të vazhduar në fushën psiko-pedagogjike.

KREU III DISPOZITA E FUNDIT

1. Ngarkohen për zbatimin e këtij urdhri, Sekretari i Përgjithshëm, Drejtoria e Përgjithshme e Politikave të Arsimit dhe Sportit, Drejtoria e Përgjithshme Rregullore për Arsimin dhe Sportin, Qendra e Shërbimeve Arsimore, Agjencia për Sigurimin e Cilësisë në Arsimin Parauniversitar, Drejtoria e Përgjithshme e Arsimit Parauniversitar, drejtoritë rajonale arsimore parauniversitare, zyrtarë vendore arsimore parauniversitare dhe institucionet e arsimit të lartë.

Ky udhëzim hyn në fuqi pas botimit në Fletoren Zyrtare.

MINISTËR I ARSIMIT DHE SPORTIT
Evis Kushi

ANEKS NR. 1

Fusha	Lëndët sipas planit mësimor në arsimin e mesëm të ulët dhe në arsimin e mesëm të lartë	Programi i Studimit (Diplomat e njëllojshme të ciklit të dytë "Master i shkencave", "Master profesional" me kohëzgjatje 2 vjeçare, 120 ECTS) Sipas fushave të studimit
Gjuhët dhe komunikimi	Gjuhë shqipe-letërsi	Studime në fushën e gjuhës shqipe dhe të letërsisë
	Gjuhë e huaj	Studime në fushën e gjuhëve të huaja
Matematikë	Matematikë	Studime në fushën e matematikës
	Biologji	Studime në fushën e biologjisë
Shkencat e natyrës	Kimi	Studime në fushën e kimisë
	Fizikë	Studime në fushën e fizikës
Shoqëria dhe mjedisi	Shkenca sociale (Qytetari, Filozofi)	Studime në fushën e shkencave sociale
	Histori	Studime në fushën e historisë
	Gjeografi	Studime në fushën e gjeografisë
	Ekonomi	Studime në fushën e ekonomisë
Arte	Muzikë	Studime në fushën e muzikës
	Art Pamor	Studime në fushën e artit pamor
	Kërcim	Studime në fushën e koreografisë
	Teatër	Studime në fushën e teatrit

Edukimi fizik, sporti dhe shëndeti	Edukim fizik	Studime në fushën e sporteve
Teknologji dhe Teknologji Informacioni dhe Komunikimi (TIK)	Teknologji Informacioni dhe Komunikimi	Studime në fushën e informatikës